

2014 Rhif 2927 (Cy. 298)

TRAFFIG FFYRDD, CYMRU

**Gorchymyn Cefnffordd yr A55
(Cyffordd 8 (Cyfnewidfa Pant
Lodge), Ynys Môn i Gyffordd 9
(Cyfnewidfa Treborth), Gwynedd)
(Gwahardd Cerddwyr) 2014**

Gwnaed 4 Tachwedd 2014

Yn dod i rym 6 Tachwedd 2014

Mae Gweinidogion Cymru, sef yr awdurdod traffig ar gyfer Cefnffordd Caer – Bangor a Cefnffordd Llundain – Caergybi (yr A55) (“y gefnffordd”), drwy arfer y pwerau a roddwyd iddynt gan adrannau 1(1), 2(3) a 124 o Ddeddf Rheoleiddio Traffig Ffyrdd 1984(1) (“Deddf 1984”), a pharagraff 27 o Atodlen 9 iddi, ac ar ôl ymgynghori â Phrif Swyddog Heddlu Gogledd Cymru, yn gwneud y Gorchymyn hwn.

Enwi, Dehongli a Chychwyn

1. Daw'r Gorchymyn hwn i rym ar 6 Tachwedd 2014 a'i enw yw Gorchymyn Cefnffordd yr A55 (Cyffordd 8 (Cyfnewidfa Pant Lodge), Ynys Môn i Gyffordd 9 (Cyfnewidfa Treborth), Gwynedd) (Gwahardd Cerddwyr) 2014.

2. (1) Yn y Gorchymyn hwn:

ystyr “y darnau o'r gefnffordd” (“*the lengths of the trunk road*”) yw'r darnau hynny o'r gefnffordd rhwng Cyffordd 8 (Cyfnewidfa Pant Lodge) ar Ynys Môn a Chyffordd 9 (Cyfnewidfa Treborth) yn Sir Gwynedd a bennir yn yr Atodlen i'r Gorchymyn hwn.

(2) Mae unrhyw gyfeiriad yn y Gorchymyn hwn at erthygl neu Atodlen â rhif yn gyfeiriad at yr erthygl neu'r Atodlen sy'n dwyn y rhif hwnnw yn y Gorchymyn hwn.

Gwaharddiad

3. Ac eithrio fel a ddarperir yn erthygl 4, ni chaiff neb, ac eithrio yn ôl cyfarwyddyd neu â chaniatâd cwnstabl yr heddlu, swyddog cymorth cymunedol yr heddlu neu swyddog gorfodi sifil, gerdded ar y darnau o'r gefnffordd a bennir yn yr Atodlen.

Esemptiadau

4. Nid oes dim yn erthygl 3 yn ei gwneud yn anghyfreithlon i gerddwr gerdded ar y darnau o'r gefnffordd pan fo:

(a) angen gwneud hynny i osgoi neu atal damwain neu i gael neu i roi help o ganlyniad i ddamwain neu argyfwng a'r cerddwr yn gwneud hynny mewn ffordd sy'n achosi cyn lleied o berygl neu anghyfleustra a phosibl i draffig arall ar y gefnffordd;

(b) y cerddwr yn gwneud hynny wrth arfer ei ddyletswydd fel cwnstabl yr heddlu, swyddog cymorth cymunedol yr heddlu neu swyddog gorfodi sifil neu fel aelod o'r gwasanaethau brys;

(c) angen gwneud hynny er mwyn adfer neu symud gwrthrych sydd wedi cwmpo ar y gefnffordd;

(d) angen gwneud hynny i gyflawni'r canlynol mewn modd effeithlon:

(i) cynnal a chadw, atgyweirio, glanhau, clirio, newid neu wella unrhyw ran o'r gefnffordd;

(ii) symud unrhyw gerbyd o unrhyw ran o'r gefnffordd; neu

(iii) codi, gosod, cynnal a chadw, profi, newid, atgyweirio neu dynnu unrhyw strwythur, gwaith neu offer yn, ar, o dan, dros, neu'n ffinio ag unrhyw ran o'r gefnffordd;

(e) pan fo angen gwneud hynny mewn cysylltiad ag unrhyw archwiliad, arolwg, ymchwiliad neu gyfrifiad sy'n ymwneud â'r gefnffordd neu unrhyw ran ohoni ac a wneir yn unol ag unrhyw awdurdod cyffredinol neu arbennig a roddir gan Weinidogion Cymru.

Dirymiadau

5. Dirymir drwy hyn Orchymyn Cefnffordd (yr A5) (Llanfairpwllgwyngyll, Gwynedd) (Gwahardd Cerddwyr) 1983(2) a Gorchymyn Cefnffordd (yr A5) (Ffordd Osgoi Bangor, Gwynedd) (Gwahardd Cerddwyr) 1983(3).

Llofnodwyd o dan awdurdod Gweinidog yr Economi, Gwyddoniaeth a Thrafnidiaeth, un o Weinidogion Cymru.

Dyddiedig

4 Tachwedd 2014

R Morgan

RICHARD MORGAN

Pennaeth Rheoli Asedau a Safonau
Llywodraeth Cymru

(1) 1984 p.27; diwygiwyd adran 1(1) gan Ddeddf Ffyrdd Newydd a Gwaith Stryd 1991 (p.22). Yn rhinwedd O.S. 1999/672, erthygl 2 ac Atodlen 1, a pharagraff 30 o Atodlen 11 i Ddeddf Llywodraeth Cymru 2006, mae'r pwerau hyn yn arferadwy bellach gan Weinidogion Cymru o ran Cymru.

(2) O.S. 1983/1771

(3) O.S. 1983/1932

YR ATODLEN

Y darn hwnnw o gerbyttfordd tua'r dwyrain y gefnffordd sy'n ymestyn o bwynt 170 o fetrau i'r gogledd-orllewin o ganolbwynt y bont sy'n cario'r A5025 dros y gefnffordd wrth Gyffordd 8 (Cyfnewidfa Pant Lodge) hyd at bwynt 74 o fetrau i'r gogledd-orllewin o ganolbwynt y bont sy'n cario'r gefnffordd dros yr A487 wrth Gyffordd 9 (Cyfnewidfa Treborth).

Y darn hwnnw o gerbyttfordd tua'r gorllewin y gefnffordd sy'n ymestyn o bwynt oddeutu 15 metr i'r gorllewin o ganolbwynt y bont sy'n cario'r gefnffordd dros yr A487 wrth Gyffordd 9 (Cyfnewidfa Treborth) hyd at bwynt 150 o fetrau i'r gogledd-orllewin o ganolbwynt y bont sy'n cario'r A5025 dros y gefnffordd wrth Gyffordd 8 (Cyfnewidfa Pant Lodge).

Y darn cyfan o'r ffordd ymuno tua'r dwyrain wrth Gyffordd 8 (Cyfnewidfa Pant Lodge).

Y darn cyfan o'r ffordd ymadael tua'r gorllewin wrth Gyffordd 8 (Cyfnewidfa Pant Lodge).

Y darn cyfan o'r ffordd ymuno tua'r dwyrain wrth Gyffordd 8A (Pont Britannia).

Y darn cyfan o'r slipffordd ymadael tua'r gorllewin wrth Gyffordd 8A (Pont Britannia).

Y darn cyfan o'r ffordd ymadael tua'r dwyrain wrth Gyffordd 9 (Cyfnewidfa Treborth).

Y darn cyfan o'r ffordd ymuno tua'r gorllewin wrth Gyffordd 9 (Cyfnewidfa Treborth).